

ଏଫିସିୟମାନଙ୍କ ନିକଟକୁ ପାଉଲଙ୍କ ପତ୍ର ଏଫିସିୟ ବିଶ୍ୱାସୀକତାଃତେ ପ୍ରେରିତ୍ ପାଉଲୁସ୍ ଆଃ ଚିଟାଉ ପାରିଟାଏ

ଏଫିସୁସ୍ ନାଗାରରେୟାଃ କାଲିସିୟାତାଃତେ ଅଲ୍ଲାନାନ୍ ଚିଟାଉ ପାଉଲୁସ୍ ଆଃ ହରାତେ ଅଲ୍ଲାନାନ୍ । ନେଆଁ ଯୀଶୁ ଖ୍ରୀଷ୍ଟ୍ ଆଃ ଜାନାମ୍ ତାୟମ୍ ୬୦ କରେ କଲସିୟ କାଲିସିୟାତାଃତେ ଅଲେତାଇକେନ୍ ଦିପିଲିରେଗି ନେ ଚିଟାଉ ଅଲ୍ଲାନାନ୍ ତାଇକେନା । ଅନଲ୍ଲନିଃ ଆଇଃକ୍ତି ପ୍ରେରିତ୍ ପାଉଲୁସ୍ ମେନ୍ତେ ପାରିଟାଏ ଏମାଃଏ, ୧:୧ । କଲସିୟ ପୁଥ୍ରେ ଜହାର୍ ମେନ୍ତେ କାଏ କାଜିକାଦ୍ରେୟଗି ଚିମିନ୍ ବାଇବାଲ୍ ପାଣ୍ଡିତ୍ କ ଏଫିସୁସ୍ ପୁଥ୍ରେ ପାଉଲୁସ୍ ଅଲ୍ଲାନାଦାଏ ମେନ୍ତେ କାଜିୟାଃ । ନେଆଁ ହରାତେ ହବାସାକାଅଆଃ ସବେନ୍ କାଲିସିୟାକେ ଚିଟାଉ ହାଟିକ୍ରେୟାଃ ଉଦେଗ୍ରେ ଅଲ୍ଲସାକାଅଃକା । ପାଉଲୁସ୍ ନେଆଁ ହରି ଉଦୁବ୍ କାଦା ଯେ, ନେ ଚିଟାଉ ଅଲ୍ଲତାଇକେନ୍ ଇମ୍ତା ଆଇଃକ୍ ଜେହେଲ୍ଲାନାନ୍ ତାଇକେନାଏ, ୩:୧;୪:୧;୬:୨୦ । ପାଉଲୁସ୍, ତୁଖ୍ କେ ଏଫିସୁସ୍ କାଲିସିୟାତେ କୁଲ୍ କିୟା ଆତଃ ଆୟାଃ ତିଃଇରେ ନେ ଚିଟାଉକେ ଏମ୍ କୁଲ୍ କେଦା ୬:୨୧-୨୨ ।

ଏଫିସୁସ୍, ଏସିଆ ପାର୍ଗାନରେୟାଃ ମିଆଁଦ୍ ମାରାକ୍ ସାହାର୍ ଆତଃ ମାରାକ୍ ନାଗାର୍ ତାଇକେନା । ଏଫିସୁସ୍ରେନ୍ ଗ୍ରୀକ୍ ମାହାପୁରୁ ଆର୍ଜେମୀରାଃ ସୁନୁସାର୍ ଆତଃ ଆୟାଃ ମାହିର୍ ନାଗେନ୍ତେ ପୁରାଃ ନୁତୁମଃତାନା, ପ୍ରେରିତ୍ ୯:୨୩-୩୧ । ଏଫିସୁସ୍ କାଲିସିୟା ଏନେଟେଦ୍ରେ ଆମ୍ତେ କେଟେୟାନ୍ ଗିକ୍ ତାଇକେନା, ମେନ୍ଦ୍ ତାୟମ୍ତେ ନେ କାଲିସିୟା ଆମ୍ତେ ନାରାଦୁରା ହବାୟାନାକ୍, ଉନୁଦୁବ୍ କାଜି ୨:୧-୭ ।

ପାଉଲୁସ୍ ଆୟାଃ ଅନଲ୍ଲରେୟାଃ ଚିମିନ୍ ହିସାକରେ, ପାର୍ମେଶ୍ୱାର୍ ଚିଲ୍ କା ଆୟାଃ ହଡକକେ ସାଲ୍ଲାକେଦ୍ କଆ ଆତଃ ଚିଲ୍ କା ଯୀଶୁ ଆଃ

ହରାତେ ପାପ୍‌ଏତେ ବାସ୍ତାଅ ନାମାକାଦାକ, ଏନାଏ ଉଦୁବେତାନା । ପାଉଲୁସ୍ କାଲିସିୟାକେ ହଡ଼ମଲଃ ଜକାକେଦ୍‌ତେ, ଖ୍ରୀଷ୍ଟ୍ ଏନାରେନ୍ ବହଃ ଆତଃ କଚାରେନ୍ ମାରାଙ୍ଗ୍ ଦିରି ତାନିଃ, ଅକ୍‌ନାଃଲଃ ତି ମେସାକେଦ୍‌ତେ ମିସାତେ ହାରା ଇଦିୟଃତାନା । ପାଉଲୁସ୍‌ଆଃ ଚିଟାଉରେୟାଃ ଆଧା ହିସାରେ ଖ୍ରୀଷ୍ଟିୟାନ୍ ଜୀଞ୍ଜାନ୍ ବିଷାଏରେ ଉଦୁବାକାଦା ।

ପୁଅ୍ ଭିତ୍ତରେ ତାଇକାନ୍ କାଜି

୧. ପାଉଲୁସ୍ କାଲିସିୟାକେ ଜହାର୍ ଆତଃ ପାରିତାଏ ଏମେତାନାଏ । ୧:୧-୨
୨. ଖ୍ରୀଷ୍ଟଲଃ କାଲିସିୟାରାଃ ନାତା । ୧:୩-୩:୨୧
୩. ଖ୍ରୀଷ୍ଟିୟାନ୍ ଜୀଞ୍ଜାନ୍ ବିତାଅରେୟାଃ ହରା । ୪:୧-୬:୨୦
୪. ପାଉଲୁସ୍‌ଆଃ ଚୁଣ୍ଟୁ ଜହାର୍ । ୭:୨୧-୨୪

୧ * ପାଉଲୁସ୍, ପାରମେଶ୍ୱାର୍‌ଆଃ ମନେ ଲେକା ଯୀଶୁ ଖ୍ରୀଷ୍ଟ୍‌ଆଃ ମିଆଁଦ୍ କୁଲ୍ୟାକାନ୍‌ନିଃ ତାନିଃ, ଇନିଃ ଯୀଶୁ ଖ୍ରୀଷ୍ଟ୍‌ରେ ମେସାକାନ୍ ପାତିୟାର୍‌ତେ ଜୀଞ୍ଜାନ୍ ବିତାଅତାନ୍ ଏଫିସୁସ୍‌ରେନ୍ ପାରମେଶ୍ୱାର୍‌ଆଃ ହଡ଼କତାଃତେ ନେ ଚିଟାଉ ଅଲ୍ୟାକାଦାଏ ।

^୨ ଆବୁଆଃ ଆପୁ ପାରମେଶ୍ୱାର୍‌ ଆତଃ ପ୍ରାଭୁ ଯୀଶୁ ଖ୍ରୀଷ୍ଟ୍ ଆପେକେ ସାୟାଦ୍ ଆତଃ ଜୀଉସୁକୁ ଏମାପେକାଏ ।

ଆମ୍ବାରେୟାଃ ଆଶିଷ୍

^୩ ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ଆପୁ ଆତଃ ପାରମେଶ୍ୱାର୍‌ଆଃ ସାହାରାଅ ହବାଅଃକା । ଚିୟାଃତି ଇନିଃ ଆବୁକେ ଖ୍ରୀଷ୍ଟଲଃ ମେସାକାଦ୍‌ରୁଆ ଆତଃ ସିର୍ମା ଦିଶୁମ୍‌ରେୟାଃ ସବେନ୍ ଲେକାନ୍ ଆମ୍ବାନ୍ ଆଶିଷ୍‌ତେ ଆଶିଷ୍‌କାଦ୍‌ରୁଆ । ^୪ ଖ୍ରୀଷ୍ଟତାଃରେ ମେସାକେଦ୍‌ତେ, ଆବୁ ଜେ'ଲେକା ପାରମେଶ୍ୱାର୍‌ଆଃ ହବାଅଃଆବୁ, ଏନାମେନ୍ତେ ଅତେଦିଶୁମ୍ ବାଇୟାନ୍ ସିଦାରେ ଇନିଃ ଆବୁକେ ସାଲ୍ୟାକାଦ୍‌ରୁଆ, ନେଆଁ ହରାତେ ଆବୁ ଆୟାଃ ଆୟାର୍‌ରେ ପାବିତାର୍ ଆତଃ ବେଗାର୍ ଦାରିୟାକାନ୍‌ଗିରୁ ତାଇନ୍ ଦାଡ଼ିୟା । ଚିୟାଃତି ଆୟାଃ ଦୁଲ୍ୟାଡ଼ତେ * ଆବୁକେ ଯୀଶୁ ଖ୍ରୀଷ୍ଟ୍‌ଆଃ ହରାତେ ଆୟାଃ ଆସୁଲ୍ ହନ୍‌କରୁ ହବାଅଃକା ମେନ୍ତେ ଇନିଃ ସିଦାରେଗି ଉହାଟ୍‌କାଦ୍

* ୧:୧ ୧:୧ ପ୍ରେରିଡ଼ ୧୮:୧୯-୨୧; ୧୯:୧.

ତାଙ୍କକେନା, ନେଆଁଗି ଆୟାଃ ସୁକୁଆନ୍ ଆଡ଼ଃ ମନେ ତାଙ୍କକେନା ।
 ୬ ପାର୍ମେଶ୍ୱାର୍ ଆୟାଃ ପୁରାଃ ସାୟାଦ୍ ହରାଡେ ଆଡ଼ଃ ଆୟାଃ ଦୁଲ୍ଲାଡ୍,
 ହନ୍‌କେ ବେଗାର୍ ଗନିଙ୍ଗ୍‌ଡେ ବାର୍‌ଦାନ୍ ଲେକା ଆବୁକେ ଏମାକାରୁ
 ନାଗେନ୍ତେ, ଆବୁ ପାର୍ମେଶ୍ୱାର୍ ଆୟାଃ ମାନାରାଙ୍ଗ୍‌ରୁ ରିକାଏୟା ।
 ୭ ✱ ଖ୍ରୀଷ୍ଟ୍ ଆୟାଃ ମାୟୋମ୍ ହରାଡେ ଆବୁ ମୁଲ୍ଲିବୁ ନାମାକାଦା, ଅର୍ଥାଡ୍
 ଆବୁଆୟାଃ ସବେନ୍ ପାପ୍‌କ ଛାମାକାନା । ପାର୍ମେଶ୍ୱାର୍ ଆୟାଃ ସାୟାଦ୍
 ପୁରାଃ ମାରାଙ୍ଗିଆ । ୮ ଏନା ସବେନ୍, ଇନିଃ ଆୟାଃ ସେଣ୍‌ନିଡେ
 ଆଡ଼ଃ ଆଟ୍‌କାର୍‌ଉରୁମ୍‌ଡେ ଆବୁକେ ପୁରାଃଗି ଏମାକାଦ୍‌ରୁଆ
 । ୯ ପାର୍ମେଶ୍ୱାର୍ ସିଦାରେ ଉହାଟ୍‌କାଦ୍ ତାଙ୍କକେନ୍‌ଡେୟାଃ,
 ଖ୍ରୀଷ୍ଟ୍‌ଲଃ ପୁରାଏ ନାଗେନ୍ତେ ଅକନ୍ ଉକୁଆକାନ୍‌ଡେୟାଃ ତାଙ୍କକେନା,
 ଏନାକେ ଇନିଃ ଆୟାଃ ବୁଗିନ୍ ସୁକୁଆନ୍ ମନେ ଲେକାଡେ ଆବୁକେ
 ଉଦୁବାକାଦ୍‌ରୁଆ । ୧୦ ନେ ଉହାଟ୍ ଲେକାଡେ ସିମ୍‌ଆ ଆଡ଼ଃ
 ଅଡେଦିଶ୍ଟୁମ୍‌ରେ ସବେନ୍ ବାଇୟାକାନ୍‌ଡେୟାଃ ମିଦଃଆ ଆଡ଼ଃ
 ଖ୍ରୀଷ୍ଟ୍ ଏନ୍ ସବେନାଃରେନ୍ ବହଃ ଲେକାଏ ତାଇନା । ନେ ଉହାଟ୍
 ପାର୍ମେଶ୍ୱାର୍ ବୁଗିନ୍ ନେଡାରେଗି ପୁରାଏୟା ।

୧୧ ସବେନାଃ ପାର୍ମେଶ୍ୱାର୍ ଆୟାଃ ଉହାଟ୍ ଆଡ଼ଃ ଇଛାସାନାଙ୍ଗ୍
 ଲେକାଗି ହବାଅଃଆ, ମୁନ୍‌ଏଡେ ଉହାଟ୍‌କାନ୍ ଲେକାଗି ଆୟାଃ
 ଇଛାସାନାଙ୍ଗ୍ ପୁରାଆ ନାଗେନ୍ତେ, ଖ୍ରୀଷ୍ଟ୍ ହରାଡେ ଆୟାଃ ଆପାନାଃ
 ହଡ୍ ହବାଅଃ ନାଗେନ୍ତେ ପାର୍ମେଶ୍ୱାର୍ ଆବୁକେ ସାଲାକାଦ୍‌ରୁଆ
 । ୧୨ ଦଲାରୁ, ଅକନ୍‌କ ସିଦାରେଗି ଖ୍ରୀଷ୍ଟ୍‌ତାଃରେ ଆସ୍ରାକାଦ୍
 ତାଙ୍କକେନାରୁ, ଏନ୍ ସବେନ୍‌କ ପାର୍ମେଶ୍ୱାର୍ ଆୟାଃ ମାନାରାଙ୍ଗ୍‌ରୁ
 ଦୁରାଙ୍ଗେଆ ।

୧୩ ଆପେୟାଗି ଆପେୟାଃ ଜୀଉବାସ୍ତାଅ ଏମେତାନ୍, ନେ
 ସୁକୁକାଜିରେୟାଃ ସାର୍‌ତି କାଜିପେ ଆୟୁମ୍‌କେଦା ଇମ୍‌ତାଏଡେ
 ପାର୍ମେଶ୍ୱାର୍ ଆୟାଃ ହଡ୍‌ପେ ହବାକାନା । ଆପେ ଖ୍ରୀଷ୍ଟ୍‌କେ ବିଶ୍ୱାସ୍‌କାଈ
 ହରାଡେ ପାର୍ମେଶ୍ୱାର୍ ଆୟାଃ ବାନାର୍‌ସା ଲେକାଡେ ପାବିତାର୍
 ଆମ୍‌କେ ଏମ୍‌କିୟା, ଆଡ଼ଃ ଆପେୟାଃ ଚେତାନ୍‌ରେ ଆୟାଃ
 ମୋହ୍‌ରକାନ୍ ଚିହ୍ନିଏ ଏମାକାଦ୍‌ପେୟା । ୧୪ ପାର୍ମେଶ୍ୱାର୍ ଆୟାଃ
 ହଡ୍‌କକେ ଆକଆଃ ହାନାଟିଙ୍ଗ୍‌କ ନାମେୟା ମେନ୍ତେ ବାନାର୍‌ସା
 ଏମାକାଦାଏ, ଏନାରେୟାଃ ଗାଞ୍ଜା ଏମ୍‌ନିଃ, ଆବୁ ନାମାକାଈ ପାବିତାର୍

ଆମ୍ଭା ତାନିଃ । ପାରମେଶ୍ଵାର ଆୟାଃ ହୃଦକକେ ପୁରାଗି ରାଡ଼ାକଆ, ଏନାମେନ୍ତେ ଆୟାଃ ମାନାରାଙ୍ଗ୍‌ରୁ ଦୁରାଙ୍ଗେଆ ।

ପାଉଲୁସଆଃ ବିକ୍ତି

୧୫ ନେଆଁମେନ୍ତେ ପ୍ରାଭୁ ଯୀଶୁତାଃରେ ଆପେୟାଃ ବିଶ୍ଵାସ୍ ଆତଃ ପାରମେଶ୍ଵାରଆଃ ହୃଦକତାଃରେ ଆପେୟାଃ ଦୁଲ୍ଲାଡ଼୍, ମେନାଃ ମେନ୍ତେ ୧୬ ଆଇଙ୍ଗ୍ ଆୟୁମକେଦ୍ ଦିପିଲିହେତେ ଆପେୟାଃ ନାଗେନ୍ତେ ପାରମେଶ୍ଵାରକେ ଧାନ୍ୟାବାଦ୍ ଏମ୍ ନାଗେନ୍ତେ କାଇଙ୍ଗ୍ ବାଗିତାନା, ଆଇଙ୍ଗ୍ ବିକ୍ତିରେ ଆପେକେଇଙ୍ଗ୍ ପାହାମପେତାନା । ୧୭ ଆତଃ ମାନାରାଙ୍ଗ୍‌ରେନ୍ ଆପୁ, ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟୁଆଃ ପାରମେଶ୍ଵାରକେଇଙ୍ଗ୍ ବିକ୍ତିତାନା, ଜେ'ଲେକାଟି ଇନିଃ ଆପେକେ ପାବିତାର୍ ଆମ୍ଭାକେ ଏମାପେୟା । ଏନ୍ ପାବିତାର୍ ଆମ୍ଭା ଆପେକେ ସେଣ୍ଟାଏ ଏମାପେୟା ଆତଃ ପାରମେଶ୍ଵାରକେ ରୁଗିଲେକାପେ ସାରି ନାଗେନ୍ତେ ଇନିଃକେ ଆପେତାଃରେ ଉଦୁବିୟା । ୧୮ ଇନିୟାଃ ମାର୍ସାଲ୍ ନେଲ୍ ନାଗେନ୍ତେ ଆପେୟାଃ ମନ୍‌ସୁରୁଦ୍‌ରେୟାଃ ମେଦ୍ ରାସ୍‌କାଅଃକା ମେନ୍ତେଇଙ୍ଗ୍ ବିକ୍ତିତାନା, ଜେ'ଲେକାଟି ଇନିଃ ଆପେକେ ଅକନ୍ ଆସ୍ତ୍ରା ନାଗେନ୍ତେ କେଡ଼ାକାଦ୍‌ପେୟା, ଆୟାଃ ପାବିତାର୍ ହୃଦକ ନାଗେନ୍ତେ ଆୟାଃ ବାନାର୍‌ସା ଟିମିନ୍ ମାନାରାଙ୍ଗ୍‌ରେୟାଃ ହାନାଟିଙ୍ଗ୍ ତାନାଃ, ୧୯ ଆତଃ ଆରୁ ଲେକାନ୍ ବିଶ୍ଵାସୀକତାଃରେ କାମିୟଃତାନ୍ ଇନିୟାଃ ପେଡ଼େଃ ଟିମିନ୍ ମାରାଙ୍ଗ୍‌ଗିଆ, ଏନ୍ ପେଡ଼େଃଗି ଆରୁତାଃରେ ପୁରାଃ ପେଡ଼େଃତେ କାମିୟଃତାନା, ଏନା ଆପେ ଆର୍‌କାର୍ ଦାଡ଼ିୟାପେ । ୨୦ ଏନ୍ ପେଡ଼େଃ ହରାତେଗି ପାରମେଶ୍ଵାର୍ ଖ୍ରୀଷ୍ଟୁକେ ଗନଏଃହେତେ ଜୀଉବିରିଦ୍‌କିୟାଏ ଆତଃ ଇନିଃକେ ସିର୍ମାରେ ଆୟାଃ ଜମ୍‌ସାଃରେ ଦୁବ୍‌କିୟା । ୨୧ ଖ୍ରୀଷ୍ଟୁ ସିର୍ମାରେନ୍ ସବେନ୍ ରାଇଜ୍‌ତାନକଏତେ, ଆକ୍‌ତେୟାର୍ ନାମାକାଦ୍‌କଏତେ, ପେଡ଼େୟାନ୍‌କଏତେ, ଆତଃ ଗମ୍‌କେକଏତେ ଚେତାନ୍ ନୁଡୁମ୍‌ରେ ଦହକିୟା, ନେ ଅତେଦିଶ୍ଵମ୍ ଆତଃ ହିଜୁଃତାନ୍ ଦିପିଲିରେୟାଃ ସବେନ୍ ଆକ୍‌ତେୟାର୍‌ଏତେ ଚେତାନ୍ ଆକ୍‌ତେୟାର୍ ଇନିୟାଃ ତାନାଃ । ୨୨ ☆ପାରମେଶ୍ଵାର୍ ସବେନାଃକେ ଖ୍ରୀଷ୍ଟୁଆଃ କାଟା ଲାତାର୍‌ରେ ଦହକେଦା ଆତଃ ସବେନ୍ ବିଷାଏରେ ଇନିଃକେ ମାରାଙ୍ଗ୍‌ଉତାର୍ ପ୍ରାଭୁ ଲେକା କାଲିସିୟାକେ

☆ ୧:୨୨ ୧:୨୨ କଲସିୟ ୧:୧୮.

ଏମ୍ବକିୟା । ^{୨୩} କାଲିସିୟା ଖ୍ରୀଷ୍ଟିଆଃ ହତ୍ତମ୍ ତାନାଃ, କାଲିସିୟା ହରାତେ ଖ୍ରୀଷ୍ଟିଆଃ କାମିକ ପୁରାଅଃଆ, ଆତଃ ଖ୍ରୀଷ୍ଟି ସବେନାଃଏ ପୁରାଏଆ ।

୨

ଗନଏଃହେତେ ଜୀଦାନ

^୧ ✱ଆପେୟାଃ କା ମାନାତିଙ୍ଗ୍ ଆତଃ ପାପ୍ ହରାତେ ସିଦା ଦିପିଲିରେ ଆମ୍ବରେ ଗଜାକାନପେ ତାଇକେନା, ^୨ ଇମ୍ବତାଙ୍ଗ୍ ଆପେ ଅତେଦିଶ୍ଟମ୍ରେୟାଃ ଏଡ୍‌କାନ ହରା ଅତଙ୍ଗ୍‌ତାନିଲଃ, ଅତେ ଆତଃ ସିର୍ମା ଆଲାରେୟାଃ ହୟରେ ରାଇଜ୍ ତାନିଃକେପେ ମାନାତିଙ୍ଗ୍ ତାଇକେନା । ନାହାଃ ଏନ୍ ଏଡ୍‌କାନ ଆମ୍ବା, ପାର୍ମେଶ୍ଟାର୍‌କେ କା ମାନାତିଙ୍ଗ୍‌ତାନ ହତ୍ତକଆଃ ଚେତାନରେ ରାଇଜେତାନା । ^୩ ସାର୍‌ତି କାଜିଲେରେ, ଆବୁ ସବେନକ ଇନ୍‌କୁ ଲେକାଗି ଆପନାଃ ହତ୍ତମ୍ରେୟାଃ ଏଡ୍‌କାନ ସାନାଙ୍ଗ୍ ଆତଃ ମନିରେୟାଃ ଏଡ୍‌କାନ ଉଡ୍‌ଠୁ ଲେକାତେବୁ ସେସେନତାନ ତାଇକେନା, ଏଟାଃକ ଲେକା ଆବୁହ ପାର୍ମେଶ୍ଟାର୍‌ଆଃ ଶ୍ଟସକାନ ହତ୍ତକବୁ ତାଇକେନା ।

^୪ ମେନ୍‌ଦ ପାର୍ମେଶ୍ଟାର୍‌ଆଃ ପୁରାଃ ଲିନିବୁଇ ଆତଃ ଆୟାଃ ପୁରାଃ ଦୁଲାଡ୍‌ଆବୁନାଙ୍ଗ୍ ନିମିନାଙ୍ଗ୍ ମେନାଃ ଯେ, ^୫ ଆବୁଆଃ ପାପ୍ ହରାତେ ଆମ୍ବରେ ଗଜାକାନ ତାଇକେନ୍ ଇମ୍ବତା, ଇନିଃ ଖ୍ରୀଷ୍ଟିଲଃ ଆବୁକେ ଜୀଦାନାଏ ଏମାଦ୍‌ବୁଆ । ନେଆଁ ପାର୍ମେଶ୍ଟାର୍‌ଆଃ ସାୟାଦ୍ ହରାତେଗି ଆପେ ବାଞ୍ଚାଅକାନାପେ । ^୬ ଆବୁ ଯୀଶୁ ଖ୍ରୀଷ୍ଟିଲଃ ମେସାୟାନ୍ ହରାତେ ଇନିଃଲଃ ସିର୍ମାରେ ରାଇଜେ ନାଗେନ୍ତେ ଇନିଃ ଆବୁକେୟଗି ଜୀଉ ବିରିଦାକାଦ୍‌ବୁଆ । ^୭ ଯୀଶୁ ଖ୍ରୀଷ୍ଟିରେ ଉଦୁବକେଦ୍ ଦୁଲାଡ୍‌ତେ ଆୟାଃ ସାୟାଦ୍‌ରେୟାଃ କା ଜକାଃଅ ପୁରାଃ ପେଡ଼େଃ ଆତଃ ଦାୟାକେ ସବେନ୍ ଦିପିଲିରେ ଉଦୁବେ ନାଗେନ୍ତେ ପାର୍ମେଶ୍ଟାର୍ ନେ ଲେକାଏ କାମିକେଦା । ^୮ ଚିୟାଃଚି ପାର୍ମେଶ୍ଟାର୍‌ଆଃ ସାୟାଦ୍ ଆତଃ ବିଶ୍ଟାସ୍ ହରାତେ ଆପେ ଜୀଉବାଞ୍ଚାଅପେ ନାମାକାଦା । ନେଆଁ ଆପେୟାଃତେଦ କାହାଗି, ମେନ୍‌ଦ ପାର୍ମେଶ୍ଟାର୍‌ଆଃ ଦାନ୍ ତାନାଃ । ^୯ ଜେତାଏ ଆପାନକେ ମାରାଙ୍ଗ୍ ମେନ୍ତେ ଆଲକାଏ ଉଡ୍‌ତୁଗି ମେନ୍ତେ ଆପନାଃ

✱ ୨:୧ ୨:୧ କଲସିୟ ୨:୧୩.

କାମିତେ କା ହବାକାନା । ୧୦ ଆବୁ ଅକ୍ନାଃ ହବା ଦାଡ଼ିକାନାବୁ, ଏନା ପାର୍ମେଶ୍ୱାର୍‌ଗି ବାଇୟାକାଦ୍‌ବୁଆ, ଅକନ୍ ବୁଗିନ୍ କାମି ଆବୁ କାମିୟାବୁ ମେନ୍ତେ ପାର୍ମେଶ୍ୱାର୍ ସିଦାରେଗି ଠାହାରାଅକାଦ୍ ତାଇକେନା, ଆବୁ ଖ୍ରୀଷ୍ଟ୍ ଯୀଶୁଲ୍‌ଃ ମେସାୟାନ୍ ହରାତେ ଏନା ହବା ସାକାଅକାନା ।

ଖ୍ରୀଷ୍ଟ୍ ହରାତେ ମିଦଃ

୧୧ ଏନାମେନ୍ତେ ଆପେୟାଃ ସିଦା ଦିପିଲି ପାହାମେପେ, ଜାନାମ୍‌ରେ ଆପେ ସାଅଁସାର୍ ହଡ଼କ ତାଇକେନାପେ । ଆପାନ୍‌କେ ଖାଡ଼ନାଅକାନ୍‌କ ତାନ୍‌ଲେ ମେନ୍ତେ କାଜିନ୍‌ତାନ୍ ଯିହୁଦୀକ, ଆପେକେ କା ଖାଡ଼ନାଅକାନ୍‌କ ମେନ୍ତେ କାଜିତାଇକେନାକ । ନେଆଁ, ହଡ଼କ ଆକଆଃ ହଡ଼ମ୍‌ରେ ଚିନାଃ ରିକାଃକ ଏନା ଏସ୍‌କାର୍ କାଜିୟାଃଏ । ୧୨ ଇମ୍‌ତା ଆପେ ଖ୍ରୀଷ୍ଟ୍‌ତାଃଏତେ ସାଜିନ୍‌ରେ ତାଇକେନାପେ । ଆପେ ଇସ୍ରାଏଲ୍ ଦିଶ୍ଟିମ୍‌ହେତେ ବାହାରିକାନ୍ ତାଇକେନାପେ, ଏଗାଃ ଦିଶ୍ଟିମ୍‌ରେନ୍ ହଡ଼କ ଲେକା ତାଇକେନାପେ ଆଡ଼ଃ ପାର୍ମେଶ୍ୱାର୍‌ଆଃ ସାଲାକାନ୍ ହଡ଼କ କାପେ ତାଇକେନା । ପାର୍ମେଶ୍ୱାର୍ ଆୟାଃ ହଡ଼କଆଃ ନାଗେନ୍ତେ ଏମାକାଦ୍ ବାନାର୍‌ସା ତେତାନ୍‌ରେ ଠାହାରାଅକାଦ୍ ରାଜିନାମାରେ ଆପେୟାଃ ଜେତାନ୍ ହିସା କା ତାଇକେନା । ବେଗାର୍ ଆସ୍ରାତେ ଆଡ଼ଃ ବେଗାର୍ ପାର୍ମେଶ୍ୱାର୍‌ତେ ଆପେ ନେ ଅଡେଦିଶ୍ଟିମ୍‌ରେପେ ତାଇନଃତାନ୍ ତାଇକେନା । ୧୩ ଖ୍ରୀଷ୍ଟ୍ ଯୀଶୁରେ ଆପେ ସାଜିନ୍‌ରେ ତାଇକେନାପେ, ମେନ୍‌ଦ ନାହାଁଃ ଖ୍ରୀଷ୍ଟ୍‌ଆଃ ମାୟୋମ୍‌ତେପେ ନାଡେୟାକାନା । ୧୪ ଚିୟାଃଚି ଯିହୁଦୀ ଆଡ଼ଃ ସାଅଁସାର୍ ହଡ଼କକେ ମିଦ୍‌କେଦ୍‌ତେ ଖ୍ରୀଷ୍ଟ୍ ଆଇଃକ୍‌ଗି ଆବୁ ଆଲାରେ ଜୀଉସୁକୁଇ ବାଇକେଦା । ଇନ୍‌କୁକେ ବିନ୍‌ଗାଅକେଦ୍‌ତେ ବାଇରି ଲେକା ଦହକାଦ୍ ପାର୍‌ରିକେ ଇନିଃ ଆୟାଃ ହଡ଼ମ୍ ହରାତେ ହାଦୁଡ଼କେଦା । ୧୫ ✧ଇନିଃ ଯିହୁଦୀକଆଃ ସବେନ୍ ଆଇନ୍, ଆନ୍‌ରୁ ଆଡ଼ଃ ନିୟାମ୍‌କ ଆତମ୍‌କେଦ୍‌ତେ ଯିହୁଦୀ ଆଡ଼ଃ ସାଅଁସାର୍ ହଡ଼କତାଃଏତେ ଆୟାଃଲ୍‌ଃ ମେନେସାରେ ମିଆଁଦ୍ ନାଝା ହଡ଼ ବାଇକିୟା, ନେ ଲେକାତେ ଜୀଉସୁକୁଇ ବାଇକେଦା । ୧୬ ✧କୁଶ୍‌ରେ ଖ୍ରୀଷ୍ଟ୍‌ଆଃ ଗନଏଃ ହରାତେ ଯିହୁଦୀ ଆଡ଼ଃ ସାଅଁସାର୍

ହତକଥା ଆଲୀରେ ତାଇକାନ୍ ବାଇରିକେ ଜିୟନ୍‌କେଦା ଆତଃ ମିଦ୍ ହତ୍‌ମରେ ମେସାକେଦ୍‌କଥା, ଏନ୍ତେ ପାର୍‌ମେଶ୍ୱାର୍‌ତାଃତେ ଆଉରୁହାଡ୍‌କେଦ୍‌କଥା । ^{୧୭} ଏନାମେନ୍ତେ ଖ୍ରୀଷ୍ଟ ହିନ୍ଦୁଃକାନ୍ ତାଇକେନାଏ ଆତଃ ପାର୍‌ମେଶ୍ୱାର୍‌ତାଃଏତେ ସାଜିନ୍‌କାନ୍ ସାଅଁସାର୍ ହତକତାଃରେ ଆତଃ ଆୟାଃ ହେପାଦ୍‌ରେନ୍ ଯିହୁଦୀ ହତକତାଃରେ ସୁକୁକାଜି ଉଦୁବ୍‌କେଦା । ^{୧୮} ଖ୍ରୀଷ୍ଟ ହରାତେଗି ଯିହୁଦୀକ, ସାଅଁସାର୍ ହତକ ଆତଃ ଆରୁ ସବେନ୍‌କ ମିଦ୍ ଆମ୍‌ରେ ଆପୁଆଃ ହେପାଦ୍‌ତେ ହିନ୍ଦୁଃ ଦାଡ଼ିକାନାରୁ ।

^{୧୯} ଏନାତେ ହେ ସାଅଁସାର୍ ହତକ, ଆପେ ଏଟାଃ ଦିଶୁମରେନ୍ ଆତଃ କା ଚିହ୍ନାର୍ ହତକ ନାହାଁଃଲାପେ, ନାହାଁଃ ପାର୍‌ମେଶ୍ୱାର୍‌ଆଃ ହତକଲଃ ଆପେୟଗି ଆୟାଃ ରାଇଜ୍‌ରେନ୍ ଆତଃ ଅଡ଼ାଃରେନ୍ ହତକ ତାନ୍‌ପେ । ^{୨୦} ଆପେୟଗି ପ୍ରେରିତକଥା ଆତଃ ନାବୀକଥା ହରାତେ ବାଇୟାକାନ୍ ନିହଁଗାତାରେ ବାଇୟାକାଦ୍ ଅଡ଼ାଃ ଲେକାଃପେ । ଏନ୍ ଅଡ଼ାଃରେୟାଃ କଟା ଦିରି ଖ୍ରୀଷ୍ଟ ଯୀଶୁଗି ତାନିଃ । ^{୨୧} ଇନିଃରେ ବାଇକାନ୍ ମିପିଆଦ୍ ଅଡ଼ାଃ ତିରିଙ୍ଗ୍‌କେଦ୍‌ତେ ଜଡ଼ାଇକାନା ଆତଃ ପ୍ରାଭୁ ନାଗେନ୍ତେ ରାକାବାକାନ୍ ପାବିତାର୍ ମାଦିର୍ ଲେକା ହାରାଇଦିୟଃତାନା । ^{୨୨} ଆୟାଃଲଃ ମେନେସାରେ ଆପେୟଗି ଏଟାଃ ସବେନ୍‌କଲଃ ମିସାତେ ଆମ୍‌ ଲେକାନ୍ ପାର୍‌ମେଶ୍ୱାର୍‌ଆଃ ତାଇନଃ ଠାୟାଦ୍ ନାଗେନ୍ତେ ଆପେ ମିଆଁଦ୍ ଅଡ଼ାଃପେ ବାଇୟଃତାନା ।

୩

ସାଅଁସାର୍ ହତକଥା ନାଗେନ୍ତେ ପାଉଲୁସ୍‌ଆଃ କାମି

^୧ ନେଆଁ ନାଗେନ୍ତେ ଆପେ ଲେକାନ୍ ସାଅଁସାର୍ ହତକ ନାଙ୍ଗ୍ ଯୀଶୁ ଖ୍ରୀଷ୍ଟ୍‌ଆଃ ହରାତେ ଜେହେଲାକାନ୍ ଆଇଙ୍ଗ୍ ପାଉଲୁସ୍, ପାର୍‌ମେଶ୍ୱାର୍‌ତାଃରେଇଙ୍ଗ୍ ବିନ୍ତିତାନା । ^୨ ଆପେୟାଃ ବୁଗିନାଃ ନାଗେନ୍ତେ ପାର୍‌ମେଶ୍ୱାର୍ ଆୟାଃ ସାୟାଦ୍‌ତେ ଆଇଙ୍ଗ୍‌କେ ନେ କାମି କାମି ନାଗେନ୍ତେ ଏନାକାଦିୟାଁ, ନେଆଁ ସାର୍‌ତିଗି ଆୟୁମ୍‌କାଦାପେ । ^୩ ପାର୍‌ମେଶ୍ୱାର୍ ଆୟାଃ ଉକୁଆକାନ୍ କାଜିକେ ଉଦୁବ୍‌କେଦ୍‌ତେ ଆଇଙ୍ଗ୍‌କେ ଉଦୁବ୍‌କାଦିୟାଁ, ଏନ୍ ବିଷାଏରେ ଆଇଙ୍ଗ୍ କାଟିଃ

ଲେକାଇଁ ଅଲ୍ଲାକାଦା । ୪ ☆ଏନା ପାଢ଼ାଅଲେରେ, ଖ୍ରୀଷ୍ଟୁଆଃ ଉକ୍ତୁଆକାନ୍ ବିଷାଏରେ ଆଇଙ୍ଗ୍ ଆଟ୍‌କାର୍ ଉରୁମ୍‌କାଦ୍‌ତେୟାଃ, ଆପେ ଆଟ୍‌କାର୍ ଉରୁମ୍ ଦାଡ଼ିୟାପେ । ୫ ସିଦା ଦିପିଲିରେ ମାନଞ୍ଜା ହଡ଼କେ ନେ ଉକ୍ତୁଆକାନ୍ କାଜି ବିଷାଏରେ କା କାଜିକାନ୍ ତାଇକେନା । ମେନ୍‌ଦ ପାର୍‌ମେଶ୍ୱାର୍ ନାହାଁଃ ଆୟାଃ ପାବିତାର୍ ପ୍ରେରିଡ଼କ ଆତଃ ନାବୀକକେ ଆମ୍ବା ହରାତେ ନେଆଁଏ ଉଦୁବ୍‌କାଦା । ୬ ଏନ୍ ଉକ୍ତୁଆକାନ୍ କାଜି ହବାଃଅତାନା, ସୁକ୍ତୁକାଜି ହରାତେ ଯିହୁଦୀକଲଃ ସାଅଁସାର୍ ହଡ଼କହଗି ପାର୍‌ମେଶ୍ୱାର୍‌ଆଃ ଆଗିଷ୍ଟ ନାମେରେୟାଃ ହିସାକ ନାମାକାଦା । ଇନ୍‌କୁ ଏନ୍ ମିଆଁଦ୍ ହଡ଼ମରେନ୍ ହଡ଼କଗି ତାନ୍‌କ ଆତଃ ଯୀଶୁ ଖ୍ରୀଷ୍ଟୁଆଃ ଦେଙ୍ଗାତେ ପାର୍‌ମେଶ୍ୱାର୍ ଏମାକାଦ୍ ବାନାର୍‌ସାରେ ହାନାଟିଙ୍ଗ୍‌କ ନାମେୟାଁ ।

୭ ପାର୍‌ମେଶ୍ୱାର୍‌ଆଃ କାମିଦାଡ଼ିୟଃ ପେଡ଼େଃ ଲେକାତେ ଆଇଙ୍ଗ୍‌କେ ଏମାକାନ୍ ଆୟାଃ ସାୟାଦ୍‌ରେୟାଃ ବାର୍‌ଦାନ୍ ହରାତେ ଆଇଙ୍ଗ୍ ଏନ୍ ସୁକ୍ତୁକାଜି ଉଦୁବ୍‌ରେୟାଃ ମିହୁଡ୍ ଦାସିଇଙ୍ଗ୍ ହବାକାନା । ୮ ଆଇଙ୍ଗ୍ ପାର୍‌ମେଶ୍ୱାର୍‌ଆଃ ହଡ଼କ ଆଲାରେ ସବେନ୍‌କତାଃଏତେ ହୁଡ଼ିଙ୍ଗ୍ ତାନିଙ୍ଗ୍, ଏନ୍‌ରେୟ, ସାଅଁସାର୍ ହଡ଼କତାଃତେ ଖ୍ରୀଷ୍ଟୁଆଃ କା ଦାଣାଁନାମଃ ଖୁଜ୍ ବିଷାଏରେୟାଃ ସୁକ୍ତୁକାଜି ଉଦୁବ୍ ନାଗେନ୍ତେ ପାର୍‌ମେଶ୍ୱାର୍ ଆଇଙ୍ଗ୍‌କେ ସୁଯୋଗ୍ ଏମାକାଦିୟାଏ । ୯ ପାର୍‌ମେଶ୍ୱାର୍‌ଆଃ ଏନ୍ ଉକ୍ତୁଆକାନ୍ କାଜିକ ଚିଲ୍‌କା କାମିୟଃଆ ଆତଃ ସବେନ୍ ହଡ଼କତାଃରେ ନେଲ୍‌ଦାଡ଼ିୟଃଆ ଏନା କାଜିରେୟାଃ ସୁଯୋଗ୍ ନାମାକାଦାଇଙ୍ଗ୍ । ସବେନାଃରେୟାଃ ବାବାଇନିଃ ପାର୍‌ମେଶ୍ୱାର୍ ଆୟାଃ ଉକ୍ତୁଆକାନ୍ କାଜିକେ ନାଙ୍ଗ୍ ପାରିୟାରେଗି ଦାନାଙ୍ଗ୍‌କେଦ୍‌ତେ ଦହକାଦ୍ ତାଇକେନା । ୧୦ ଜେ'ଲେକାଟି ନେ ଦିପିଲିରେ କାଲିସିୟାରେୟାଃ କାମି ହରାତେ ସିର୍ନାରେ ରାଇଜ୍‌ତାନ୍‌କ ଆତଃ ସିର୍ନାରେ ଆକ୍‌ତେୟାର୍ ନାମାକାଦ୍‌କ, ପାର୍‌ମେଶ୍ୱାର୍‌ଆଃ ଚିମିନ୍ ରାକାମ୍‌ରେୟାଃ ସେଣାଁ ବିଷାଏରେକ ଆଟ୍‌କାର୍‌ଉରୁମ୍ ଦାଡ଼ିୟା । ୧୧ ପାର୍‌ମେଶ୍ୱାର୍‌ଆୟାଃ ଜାନାଅ ଜାନାଅରେୟାଃ ଉଦେଶ୍ ଲେକାତେ ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟୁଆଃ ହରାତେ ନେଆଁଏ ରିକାକାଦା । ୧୨ ଖ୍ରୀଷ୍ଟୁଲଃ ମେସାକାନ୍ ହରାତେ ଆତଃ ଆୟାଃତାଃରେ ବିଶ୍ୱାସ୍‌ତାନ୍

☆ ୩:୪ ୩:୪ କଲସିୟ ୧:୨୭,୨୭.

ହରାତେ ପୁରାଃ ଭାର୍ଯ୍ୟାକେଦ୍ତେ ପାର୍ମେଶ୍ଵାର୍ଆଃ ହେପାଦ୍ତେ ସେନ୍ ନାଙ୍ଗ୍ ଆବୁଆଃ ଜୀଉରେ କେଟେଦ୍ ମେନାଃ । ୧୩ ଏନାମେନ୍ତେ ଆଇଙ୍ଗ୍ ବିକ୍ରିତାନା, ଆପେ ନାଗେନ୍ତେଇଙ୍ଗ୍ ଦୁକ୍ଷତାନା ମେନ୍ତେ ଆପେ ଆଲ୍ପେ ନାରାଜଃ, ଚିୟାଃତି ନେ ସବେନାଃ ଆପେୟାଃ ବୁଗିନାଃ ନାଗେନ୍ତେ ହବାକାନା ।

ଖ୍ରୀଷ୍ଟିଆଃ ଦୁଲ୍ଲାଡ୍

୧୪ ନେଆଁମେନ୍ତେ ଆଇଙ୍ଗ୍ ଆପୁ ପାର୍ମେଶ୍ଵାର୍ଆଃ ସାମ୍ନାଙ୍ଗ୍ରେ ଇକ୍ତ୍ତ୍ମୁକେଦ୍ତେଇଙ୍ଗ୍ ବିକ୍ରି ତାନା, ୧୫ ଅକଏତାଃଏତେଚି ସିର୍ମା ଆଡଃ ଅତେଦିଶ୍ଵମ୍ରେନ୍ ସବେନ୍ ପାରିବାରକ ଆୟାଃ ସାର୍ତି ନୁତୁମକ ନାମାକାଦା । ୧୬ ଆଇଙ୍ଗ୍ ପାର୍ମେଶ୍ଵାର୍କେଇଙ୍ଗ୍ ବିକ୍ରିତାନା, ଜେ'ଲେକାଚି ଆୟାଃ ମାନାରାଙ୍ଗ୍ରେୟାଃ ଖୁଜ୍ ଲେକାତେ ଆୟାଃ ଆମ୍ନା ହରାତେ ଆପେୟାଃ ମନ୍ସୁରୁଦ୍କେ ପୁରାଃ ପେଡ଼େଜେ ନାଗେନ୍ତେ ପେଡ଼େଃ ଏମାପେୟାଏ, ୧୭ ଆଡଃ ବିଶ୍ଵାସ୍ ହରାତେ ଖ୍ରୀଷ୍ଟି ଆପେୟାଃ ମନ୍ସୁରୁଦ୍ରେ ତାଇନା । ଆପେୟାଃ ନିହିଁ ଗାଡା ଦୁଲ୍ଲାଡ୍ରେ କେଟେଜାକାନ୍ ହବାଅଃଆ । ୧୮ ଏନାରେ ଖ୍ରୀଷ୍ଟିଆଃ ଦୁଲ୍ଲାଡ୍ ଚିମିନ୍ ଜିଲିଙ୍ଗ୍ ଆଡଃ ଚାକାର୍, ଚିମିନ୍ ସାଲାଙ୍ଗ୍ ଆଡଃ ଇକିର୍ ତାନାଃ, ଏନା ଆପେ ପାର୍ମେଶ୍ଵାର୍ଆଃ ହଡ଼କଲଃ ଆବ୍କାର୍ଡରମ୍ ଦାଡ଼ିରେୟାଃ ପେଡ଼େଃପେ ନାମ୍ ଦାଡ଼ିୟା । ୧୯ ହେଗି, ନେଆଁ ଚିଉଲାଅ ପୁରା କା ଆବ୍କାର୍ ଦାଡ଼ିୟାରେୟ, ଆପେ ଖ୍ରୀଷ୍ଟିଆଃ ଦୁଲ୍ଲାଡ୍ପେ ଆବ୍କାରେକା ମେନ୍ତେ ଆପେ ପାର୍ମେଶ୍ଵାର୍ଆଃ ସଭାବ୍ରେ ପୁରାଃତେପେ ପେରେଃ ଦାଡ଼ିୟାକା ।

୨୦ ପାର୍ମେଶ୍ଵାର୍ ଆବୁଆଃ ଆଲାରେ କାମିୟାତାନ୍ ଆୟାଃ ପେଡ଼େଃ ହରାତେ ଆବୁଆଃ ଆନାସିଏତେ ଆଦ୍କା ଚାଏ ଆବୁଆଃ ଉଡ଼ୁଏତେ ଆଦ୍କା ଏମ୍ ଦାଡ଼ିନିଃ ତାନିଃ । ୨୧ କାଲିସିୟା ହରାତେ ଆଡଃ ଯୀଶୁ ଖ୍ରୀଷ୍ଟିଆଃ ହରାତେ ସବେନ୍ ଇମ୍ତା ଜାନାଆ ଜାନାଆ ଜାକେଦ୍ ଏନ୍ ପାର୍ମେଶ୍ଵାର୍ଆଃ ମାଇନାନ୍ ହବାଅଃକା ! ଆମେନ୍ ।

୪

ହଡ଼ମ୍ରେ ମିଦେନ୍

୧ ପ୍ରାଭୁଆଃ ସ୍ଵାସ୍ତ୍ରତାନ୍ ହରାତେ ଜେହେଲାକାନ୍ ଆଇଙ୍ଗ୍ ପାଉଲ୍ସ୍ ଆପେକେଇଙ୍ଗ୍ ବିକ୍ରିତାନା, ପାର୍ମେଶ୍ଵାର୍ ଆପେକେ

କେଡ଼ାକାଦପେ ଲେକାଗି ଜୀଝାନ ବିତାଏପେ । ^୨ ✱ସବେନ୍ ଇମ୍ତା ମନ୍ ହୁଡ଼ିଙ୍ଗ୍‌ୟେନ୍, ଲେବେଃ, ଆଡ଼ଃ ଧିରାଜ୍ ଜୀଝାନ ହବାଅଃପେ । ମିହୁଡ୍ ଆଡ଼ଃମିହୁଡ୍‌ଲଃ ସାହାଡ଼ିଙ୍ଗ୍‌ତାନ୍‌ଲଃ ଦୁଲାଡ଼ରେ ତାଇନ୍‌ପେ । ^୩ ପାବିତାର୍ ଆମ୍‌ରାଃ ଦେଙ୍ଗାତେ ଜୀଝସୁକୁରେ ତାଇନଃ ନାଗେନ୍ତେ ଆପେ ଆଲାରେ ତାଇନାକାନ୍ ମୈନେସାରେୟାଃ ତନଲ୍‌କେ ଜୀଝଜାତାନ୍ ଦହକାପେ । ^୪ ମିଆଁଦ୍‌ଗି ହଡ଼୍‌ମ୍ ଆଡ଼ଃ ମିଆଁଦ୍‌ଗି ଆମ୍‌, ଆଡ଼ଃ ମିଆଁଦ୍‌ଗି ଆସ୍ରାତେ ପାର୍‌ମେଶ୍‌ବାର୍ ଆପେକେ କେଡ଼ାକାଦପେୟା । ^୫ ମିଆଁଦ୍‌ଗି ପ୍ରାଭୁ, ମିଆଁଦ୍‌ଗି ବିଶ୍ୱାସ୍ ଆଡ଼ଃ ମିଆଁଦ୍‌ଗି ବାପ୍ତିସ୍ମା ମେନାଃ । ^୬ ସବେନ୍ ମାନଝାକଆଃ ପାର୍‌ମେଶ୍‌ବାର୍ ଆଡ଼ଃ ଆପୁ ମିଆଁଦ୍‌ଗି ତାନିଃ, ଇନିଃ ସବେନ୍‌କଆଃ ପ୍ରାଭୁ, ସବେନ୍‌କଆଃ ଆଲାରେ ଆଡ଼ଃ ସବେନ୍‌କଆଃରେ ମେନାଇୟା ।

^୭ ଖ୍ରୀଷ୍ଟ୍ ଏମାକାଦ୍ ବାର୍‌ଦାନ୍ ଲେକାତେ ଆବୁ ସବେନ୍ ମିମିଆଦ୍ ହଡ଼କକେ ସାୟାଦ୍‌ରାଃ ବାର୍‌ଦାନ୍ ନାମାକାନା । ^୮ ଧାରାମ୍‌ପୁଅରେ ନେ ବିଷାଏରେ ଅଲ୍‌କାନା, “ତିମ୍‌ତା ଇନିଃ ପୁରାଃ ଚେତାନ୍‌ତେ ସେନଃୟାନା, ଇମ୍ତା ଇନିଃ ପୁରାଃ ଜେହେଲାକାନ୍‌କକେ ଆୟାଃଲଃ ଇଦିକେଦ୍‌କଆ; ଆଡ଼ଃ ମାନଝାକକେ ପୁରାଃଗି ବାର୍‌ଦାନ୍ ଏମାଦ୍‌କଆଏ ।” ^୯ “ଇନିଃ ପୁରାଃ ଚେତାନ୍‌ତେ ସେନଃୟାନା” ନେଆଁରେୟାଃ ମୁଣ୍ଡି ତିନାଃ ତାନାଃ ? ନେଆଁରେୟାଃ ମୁଣ୍ଡି ହବାଅଃତାନା, ସିଦାତେ ଇନିଃ ପୁରାଃ ଲାତାର୍ ଠାୟାଦ୍ ଅତେତେ ଆଡ଼ଗୁୟାନା । ^{୧୦} ଏନାତେ ଆଡ଼ଗୁକାନ୍‌ନିଃ, ପୁରା ଅତେଦିଶୁମ୍‌କେ ପୁରାଏ ନାଗେନ୍ତେ ଇନିଃ ସିମ୍‌ରେୟାଃ ପୁରାଃ ଚେତାନ୍‌ତେ ସେନଃୟାନା । ^{୧୧} ଇନିଃଗି ହଡ଼କକେ ବାର୍‌ଦାନ୍ ଏମାକାଦ୍‌କଆଏ, ତିମିନ୍‌କକେ ପ୍ରେରିଡ୍, ତିମିନ୍‌କକେ ନାବୀ, ତିମିନ୍‌କକେ ସୁକୁକାଜି ଉଦୁବ୍, ତିମିନ୍‌କକେ ପାର୍‌ଚାର୍ ଆଡ଼ଃ ତିମିନ୍‌କକେ ଇଡୁରେୟାଃ ବାର୍‌ଦାନ୍ ଏମାଦ୍‌କଆଏ । ^{୧୨} ଖ୍ରୀଷ୍ଟ୍‌ଆଃ ଏନ୍ ହଡ଼୍‌ମ୍ ବାଇୟେ ନାଗେନ୍ତେ, ଖ୍ରୀଷ୍ଟ୍‌ଆଃ ସେଝା କାମି ନାଗେନ୍ତେ ଆଡ଼ଃ ପାର୍‌ମେଶ୍‌ବାର୍‌ଆଃ ହଡ଼କକେ ସେକାଡ଼କ୍ ନାଗେନ୍ତେ ଇନିଃ ନେଆଁଏ କାମିକାଦା । ^{୧୩} ଏନାମେନ୍ତେ ଆବୁ ସବେନ୍‌କ ଆବୁଆଃ ବିଶ୍ୱାସ୍‌ରେ ଆଡ଼ଃ ପାର୍‌ମେଶ୍‌ବାର୍‌ଆଃ ହନ୍ ବିଷାଏରେୟାଃ ସେଣ୍‌ରେବୁ ମିଦଃକା, ତାଏ

✱ ୪:୨ ୪:୨ କଲସିୟ ୩:୧୨,୧୩.

ଖ୍ରୀଷ୍ଟିଆ ଯୁବାକାନ୍ ହତ୍ତମଲେକାତେ, ଆରୁ ପକ୍ତାକାନ୍ ହତ୍ତକବୁ ହବାଅଃକା । ୧୪ ଆଲ୍‌ପୁଙ୍ଖ୍ ଆତଃ ହୟତେ ଏକ୍‌ଲ୍ୟାଅଃତାନ୍ ଲେକା ଆଲକାରୁ ହବାଅଃକା, ଆତଃ ସିଟିଆ ଲେକା ଆରୁ ଆଲକାରୁ ନେତେହାନ୍ତେୟଃକା । ଏଟାଃକକେ ଏଟାଃ ହରାତେ ଇଦିତାନ୍ ବେଦା ହତ୍ତକଆଃ ହସତ୍ତ ଇନିତୁରେ ଆରୁ ଆଲକାରୁ ବେଦାଅଃକା । ୧୫ ମେନ୍ଦ ଦୁଲ୍ଲାଡ୍ରେ ସାର୍ତ୍ତି କାଜିତାନ୍‌ଲଃ ସବେନ୍ କାଜିକରେ ବହଃ ଲେକାନ୍ ଖ୍ରୀଷ୍ଟି ଲେକାରୁ ହବାଅଃକା । ୧୬ ☆ଇନିଃ ସାଃଏତେ ହତ୍ତମରେୟାଃ ସବେନ୍ ଏଟାଃ ଏଟାଃ ହିସାକ ମିଦ୍ରେ ଜଡ୍ଡେନ୍‌କାନା ଆତଃ ପୁରା ହତ୍ତମ ଏଟାଃ ଏଟାଃ ହିସାଏତେ ମିଦ୍ରେ ଜଡ୍ଡେନ୍‌କାନ୍‌ଲଃ ଏନାକେ ଦେଙ୍ଗାଏତାନା । ଏନାତେ ମିନିଆଦ୍‌କଆଃ ଏଟାଃ ଏଟାଃ କାମି ତାନାଃରେୟ ଦୁଲ୍ଲାଡ୍ରେ ପୁରା ହତ୍ତମ ହାରା ଇଦିୟଃତାନା ଆତଃ ଆଇଃକ୍‌ତେଗି ବାଇୟଃତାନା ।

ଖ୍ରୀଷ୍ଟିରେ ନାମ୍ନା ଜୀଦାନ୍

୧୭ ଏନାତେ ପ୍ରାଭୁଆଃ ନୁତୁମ୍‌ତେ ଆଇଙ୍ଗ୍ ଚେତାଅପେ ତାନାଇଙ୍ଗ୍, ସାଆଁସାର୍ ହତ୍ତକ ଲେକା ଜୀଦାନ୍ ଆଲ୍‌ପେ ବିତାଏ, ଇନ୍‌କୁଆଃ ଉଡ୍ଡୁକ୍ ଜେତାନ୍ କାମିରାଃ ନାହାଁଲାଃ ୧୮ ଆତଃ ଇନ୍‌କୁଆଃ ମନ୍‌କ୍ ନୁବାଃଗିଆ । ପାର୍‌ମେଶ୍ୱାର୍ ଏମାକାଦ୍ ଜୀଦାନ୍‌ରେ ଇନ୍‌କୁଆଃ ଜେତାନ୍ ହିସା ବାନଃଆ । ଚିୟାଃଚି ଇନ୍‌କୁ ପୁରାଗି ସାରିକେଦ୍‌ତେ କା ସାରି ଲେକା ମନ୍‌ସୁରୁଦ୍‌କେ କେଚେଜେତାନ୍ ହତ୍ତକତାନ୍‌କ । ୧୯ ଇନ୍‌କୁ ବେଗାର୍ ଗିହୁଃତେ, ସବେନ୍ ଲେକାନ୍ ସତ୍‌ରା କାମି ଆତଃ ଆପାଙ୍ଗିର୍ କାମି କାମି ନାଗେନ୍ତେ ଆକ ଆକଗିକ ଜିମାକାନା ।

୨୦ ନେ ଲେକାତେ ଆପେ ଖ୍ରୀଷ୍ଟିକେ ସାରି ନାଙ୍ଗ୍ କାପେ ଇତୁଆକାନା । ୨୧ ଆପେ ସାର୍ତ୍ତିଗି ଇନିୟାଃ ବିଷାଏରେ ଆୟୁମ୍‌କାଦାପେ ଆତଃ ଆଇଃକ୍‌କେ ଅତଙ୍ଗ୍‌ନିଃ ଲେକା ଯୀଶୁଆଃ ସାର୍ତ୍ତି ବିଷାଏରେୟାଃ ଇନିତୁପେ ନାମାକାଦା । ୨୨ ☆ଏନାତେ ଆପେ ଅକନ୍ ମାରି ସଭାବ୍‌ତେ ଜୀଦାନ୍ ବିତାଅ ତାଇକେନାପେ, ଏନାକେ ବାଗିତାପେ, ଚିୟାଃଚି ଏନାରେୟାଃ ହସତ୍ତ କାମି ହରାତେ ଆପେୟାଃ ଆମ୍ବା ଜିୟନଃ ତାଇକେନା । ୨୩ ଆପେୟାଃ ମନ୍‌ସୁରୁଦ୍ ଆତଃ ମନ୍‌କ୍

☆ ୪:୧୭ ୪:୧୭ କଲସିୟ ୨:୧୯. ☆ ୪:୨୨ ୪:୨୨ କଲସିୟ ୩:୯.

ପୁରାଣି ନାମ୍ନା ହବାଅଃ ଲାଗାତିଙ୍ଗ୍‌ୟାଃ, ୨୪ ☆ଆତଃ ପାର୍ମେଶ୍ଵାର୍‌ଆଃ
ଲେକାଗି ବାଲୟାକାନ୍ ନାମ୍ନା ଆମ୍ବା ନାମେପେ । ଏନା ଆପେୟାଃ
ସାର୍‌ତି ଜୀଦାନରେ ପାବିତାର୍ ଆତଃ ଧାର୍ମାନ୍ ଉଦୁବଃକା ।

୨୫ ଏନାମେନ୍ତେ ଆତଃ ଆଲ୍‌ପେ ବେଦାଃ । ଶ୍ରୀଷ୍ଟ୍ ବିଶ୍ଵାସୀକ
ମିହୁଡ୍ ଆତଃମିହୁଡ୍‌କେ ସାର୍‌ତି କାଜି ଲାଗାତିଙ୍ଗ୍‌ୟାଃ, ଚିୟାଃତି
ଆବୁ ସବେନ୍‌କ ଶ୍ରୀଷ୍ଟ୍‌ଆଃ ହଡ୍‌ମରେନ୍ ହିସାକ ତାନ୍‌ବୁ । ୨୬ ଆପେ
ଶ୍ଵଅଃ ତାନ୍‌ରେଦ, ପାପ୍ କାମି ଆଲ୍‌ପେ କାମିୟା । ସିଙ୍ଗି ହାସୁର୍
ସିଦାରେ ଆପେୟାଃ ଶ୍ଵକ୍ ବାଗିତାପେ । ୨୭ ସାଏତାନ୍‌କେ ଆପେରେ
ଠାୟାଦ୍ ଆଲ୍‌ପେ ଏମାଲୟା । ୨୮ କୁମ୍‌ଡୁ ଆତଃ ଆଲକାଏ
କୁମ୍‌ଡୁକ୍‌କା, ମେନ୍‌ଦ ଆପାନାଃ ଜୀନିଦ୍ ନାଗେନ୍ତେ ଆତଃ ନାରାଦୁରା
ହଡ୍‌କକେ ଆକଆଃ ଲାଗାତିଙ୍ଗ୍‌ତେୟାଃ ଏମ୍ ଦାଡ୍ଡି ନାଗେନ୍ତେ
ବୁଗିନାଃ କାମିକା । ୨୯ ଆପେୟାଃ ମତାଏତେ କା ଲାଗାତିଙ୍ଗ୍ କାଜିକ
ଆଲକା ଅତଙ୍ଗ୍‌ଅଃକା, ମେନ୍‌ଦ ଲାଗାତିଙ୍ଗ୍ ଇମ୍‌ତାକରେ ପୁରାଃ
ବୁଗିନ୍ କାଜି ଅତଙ୍ଗ୍‌ଅଃକା, ଜେ'ଲେକାଗି ଆୟୁମ୍‌ତାନ୍ ହଡ୍‌କଆଃ
ନାଗେନ୍ତେ ବୁଗିନାଃ ହବାଅଃଆ । ୩୦ ଆତଃ ପାର୍ମେଶ୍ଵାର୍‌ଆଃ
ପାବିତାର୍ ଆମ୍ବାକେ ଦୁକୁ ଆଲ୍‌ପେ ଏମାଲୟା, ଚିୟାଃତି ପାବିତାର୍
ଆମ୍ବା ଆପେୟାଃ ରେତାନ୍‌ରେ ପାର୍ମେଶ୍ଵାର୍‌ଆଃ ଆପ୍‌ନାଃ
ଆକ୍‌ତେୟାର୍‌ରେୟାଃ ଚିହ୍ନାଁ ଲେକାନ୍‌ନିଃ ତାନିଃ ଆତଃ ପାର୍ମେଶ୍ଵାର୍
ମୁସିଙ୍ଗ୍ ଆପେୟାଃ ମୁକ୍ତି କାମି ରିକାୟାଏ, ଏନା ସାର୍‌ତି ତାନାଃ ।
୩୧ ସବେନ୍ ଲେକାନ୍ ମେହେର୍ କାଜି, ଆତଃ ଶ୍ଵ, ସାଙ୍ଗିନେପେ
। ହିସିଙ୍ଗା କାଜି ଆତଃ ନିୟା କାଜିକ ଆଲ୍‌ପେୟାଃ । ଜେତାଏକେ
ଆଲ୍‌ପେ ହିଲାଙ୍ଗ୍‌କଆ । ୩୨ ☆ମେନ୍‌ଦ ମିହୁଡ୍ ଆତଃମିହୁଡ୍‌ଲଃ ଦାୟା
ଆତଃ ଲେବେଃ ମନ୍‌ସୁରୁଦ୍ ହବାଅଃପେ ଆତଃ ଶ୍ରୀଷ୍ଟ୍‌ଆଃ ହରାତେ
ପାର୍ମେଶ୍ଵାର୍ ଆପେକେ ଛାମାକାଦ୍‌ପେ ଲେକାଗି ଆପେ ମିହୁଡ୍
ଆତଃମିହୁଡ୍‌କେ ଛାମାକପେ ।



ମାର୍ସାଲ୍‌ରେ ଜୀନିଦ୍

^୧ ଆପେ ପାର୍ମେଶ୍ଵାରୀଆ ଦୁଲାଡ଼୍ ହନ୍କ ତାନପେ, ଏନାତେ ଆପେ ଆୟାଃ ଲେକା ହବାଅଃପେ । ^୨ ଖ୍ରୀଷ୍ଟ ଆବୁକେ ଦୁଲାଡ଼କେଦରୁଆ ଆତଃ ପାର୍ମେଶ୍ଵାରୀଆ ସୁକୁଆନ୍ ଲେକା ଆବୁଆଃ ନାଗେନ୍ତେ ଆୟାଃ ଜୀଦାନକେ ବୁଗିନ୍ ସହାନ୍ ଲେକା ଦାନ୍ ଆତଃ ଦାଣ୍ଠେ ରାକାରୟାନା, ଆପେୟାଃ ଜୀଦାନରେୟ ଏନ୍ଲେକାଗି ଦୁଲାଡ଼ରେ ତାଇନ୍ପେ ।

^୩ ପାର୍ମେଶ୍ଵାରୀଆ ହଡ଼କ ହବାୟାନ୍ତେ, ଆପେ ଆଲାରେ ଆପାଙ୍ଗିର୍ କାମି, ସତ୍ତରା ତାଏ ଖୁଜ୍ କରେୟାଃ ହାୟା ଆଲକା ହବାଅଃକା । ନେଆଁ ସାଧୁ ହଡ଼କ ନାଗେନ୍ତେୟ ରିକା କା ଲାଗାତିଙ୍ଗୟାଃ । ^୪ ଆତଃ ଆପେୟାଃ ଆଲାରେ ଗିହୁଃ କାଜିକ, ଡଣ୍ଡ କାଜିକ, ଆତଃ ଲାୟା କାଜିକ ଆଲକା ହବାଅଃକା । ମେନ୍ଦ୍ ଆପେକେ ପାର୍ମେଶ୍ଵାରୀଆ ଧାନଧାବାଦ୍ ଏମ୍ ଲାଗାତିଙ୍ଗୟାଃ । ^୫ ନେଆଁ ସାର୍ତି ତାନାଃ ମେନ୍ତେ ଆଟ୍‌କାରକାପେ, ଜେତାଏ ଆପାଙ୍ଗିର୍ନିଃ, ସତ୍ତରାନ୍‌ିଃ ଆତଃ ଖୁଜ୍ କରେୟାଃ ହାୟାନିଃ ତାଏ ମୁରୁଡ଼ ସେଝାନିଃ ଚିତ୍‌ଲାଅ ଖ୍ରୀଷ୍ଟ ଆତଃ ପାର୍ମେଶ୍ଵାରୀଆ ରାଇଜ୍‌ରେୟାଃ ଜେତାନ୍ ହାନାଟିଙ୍ଗ୍ କାଏ ନାମେୟାଁ ।

^୬ ଜେତାଏ ଆପେକେ ସାମାକାଜିକତେ ଆଲକାଏ ବେଦାପେକା, ନେ ସବେନାଃ ନାଗେନ୍ତେ ପାର୍ମେଶ୍ଵାରୀଆ ଆନ୍‌ବୁକେ କା ମାନାତିଙ୍ଗ୍‌ତାନ୍ ହଡ଼କଆଃ ତେତାନ୍‌ରେ ପାର୍ମେଶ୍ଵାରୀଆ ଖୁସ୍ ହିଜୁଃଆ । ^୭ ଏନାତେ ନେ ଲେକାନ୍ ହଡ଼କଲଃ ଜେତାନ୍ ନାତା ଆଲ୍‌ପେ ଦହଏୟା । ^୮ ଚିୟାଃଟି ଆପେୟାଗି ମୁସିଙ୍ଗ୍ ନୁବାଃରେପେ ତାଇନ୍‌କେନା । ମେନ୍ଦ୍ ନାହାଁଃ ଆପେ ପ୍ରାଭୁଆଃ ହଡ଼କ ହବାକାନ୍ ହରାତେ ମାର୍ସାଲ୍‌ରେ ମେନାପେୟା । ଏନାତେ ଆପେ ମାର୍ସାଲ୍‌ରେନ୍ ହଡ଼କ ଲେକା ସେସେନ୍‌ପେ । ^୯ ଚିୟାଃଟି ମାର୍ସାଲ୍‌ରେଗି ତାଇନ୍‌ଃରେ ସବେନ୍ ଲେକାନ୍ ବୁଗିନାଃ ଧାର୍‌ମାନ୍ ଆତଃ ସାନାର୍‌ତିରେୟାଃ କାମି ହବାଅଃଆ । ^{୧୦} ପ୍ରାଭୁଆଃ ଚିକ୍‌ନାଃ ସୁକୁଆନ୍‌ତେୟାଃ ତାନାଃ, ଏନାକେ ଆଟ୍‌କାରରୁମ୍ ଲାଗାତିଙ୍ଗୟାଁ । ^{୧୧} ସାମାରେୟାଃ କାମି ନୁବାଃରେ କାମିତାନ୍ ହଡ଼କଲଃ ଆଲ୍‌ପେ ମେସାନା, ମେନ୍ଦ୍ ଲନ୍‌କୁଆଃ କାଜିକାମିକ ମାର୍ସାଲ୍‌ରେ ଉଦୁବେପେ । ^{୧୨} ଲନ୍‌କୁ ଉକ୍‌କେଦ୍‌ତେ କାମିତାନ୍ ବିଷାଏକେ କାଜିତେୟାଃ ପୁରାଃ ଗିହୁଃଗିୟା

। ୧୩ ମେନ୍ଦ ଚିମ୍ତା ଏନ୍ ସବେନାଃ ମାର୍ସାଲ୍‌ତେ ଆଉଠଆ, ଇମ୍ତା ଏନାରେୟାଃ ସାର୍ତି ସଭାବ୍ ପୁରା ଉଦୁବଃଆ, ୧୪ ଚିୟାଠି ମାର୍ସାଲ୍‌ରେ ସବେନାଃ ପୁରା ନେଲଃଆ । ଏନାତେ ନେ'ଲେକା କାଜିକାନା,

“ଏ ଦୁଡ଼ମୁତାନନିଃ, ଏୟନଃମେ

ଆତଃ ଗଜାକାନକଏତେ ଜୀଉବିରିଦ୍‌ମେ !

ଆତଃ ଖ୍ରୀଷ୍ଟ ଆମ୍‌କେ ମାର୍ସାଲ୍ ଏମାମେୟାଏ ।”

୧୫ ଏନାତେ ଆପେ ଚିଲ୍‌କାପେ ସେସେନା ଏନା ଚିର୍ଗାଲ୍‌କାନ୍ ତାଇନ୍‌ପେ । କା ସେଣ୍‌ନ୍ ଲେକା କା ହବାକେଦ୍‌ତେ ସେଣ୍‌ନ୍ ଲେକା ହବାଅଃପେ । ୧୬ ☆ସବେନ୍ ସୁଯୋଗ୍‌କେ ବୁଗିଲେକା ବେଭାରେପେ, ଚିୟାଠି ଦିପିଲିକଦ ଏଡ଼କାନଗିୟା । ୧୭ ଡ଼ଣ୍ଡକଆଃ ଲେକା ଆଲ୍‌ପେ ହବାଅଃଆ, ମେନ୍‌ଦ ପ୍ରାଭୁଆଃ ଇଛାସାନାଙ୍ ଆବ୍‌କାର୍‌ଉରୁମେପେ ।

୧୮ ଆପେୟାଃ ଜିୟନ୍ ରିକାଏତାନ୍ ଇଲିଆର୍‌ଖ୍‌ରେ ଆଲ୍‌ପେ ବୁଲଃଆ, ମେନ୍‌ଦ ଆମ୍‌ତେ ପେରେଜଃପେ । ୧୯ ☆ଦୁରାଙ୍ଗ୍, ଭାଜାନ୍ ଆତଃ ଆମ୍‌ତେ ଦୁରାଙ୍ଗ୍‌ତାନଲଃ ମିହୁଡ଼ ଆତଃମିହୁଡ଼କେ ରାସ୍‌କାଇପେ । ମନ୍‌ସୁରୁଦ୍‌ରେୟାଃ ଦୁରାଙ୍ଗ୍‌ତେ ପ୍ରାଭୁଆଃ ନୁଡ଼ମ୍‌ତେ ଦୁରାଙ୍ଗ୍‌ୟେପେ । ୨୦ ସବେନ୍ ଇମ୍ତା ସବେନାଃ ନାଗେନ୍ତେ ପ୍ରାଭୁ ଯିଶୁ ଖ୍ରୀଷ୍ଟଆଃ ନୁଡ଼ମ୍‌ତେ ଆବା ପାର୍‌ମେଶ୍‌ବରକେ ଧାନ୍ୟାବାଦ୍ ଏମାଲ୍‌ପେ ।

କଡ଼ା ଆତଃ କୁଡ଼ି

୨୧ ଆପେ ଖ୍ରୀଷ୍ଟକେ ବରଭାକ୍ତିତାନଲଃ ମିହୁଡ଼୍ ଆତଃମିହୁଡ଼ତାଃରେ ଜିମାନ୍‌ପେ । ୨୨ ☆କୁଡ଼ିକ, ଆପେ ପ୍ରାଭୁତାଃରେ ଜିମାନ୍‌ତାନ୍ ଲେକାଗି ଆପାନ୍ କଡ଼ାକତାଃରେ ଜିମାନ୍‌ପେ । ୨୩ କାଲିସିୟା ଚେତାନ୍‌ରେ ଖ୍ରୀଷ୍ଟଆଃ ଆକ୍‌ତେୟାର୍ ମେନାଃ ଲେକା କୁଡ଼ି ଚେତାନ୍‌ରେ କଡ଼ାରାଃ ଆକ୍‌ତେୟାର୍ ମେନାଃ, ଆତଃ ଖ୍ରୀଷ୍ଟଗି ଆୟାଃ ହଡ଼ମ୍ ଲେକାନ୍ କାଲିସିୟାରେୟାଃ ବାସ୍ତାଅନିଃ ତାନିଃ । ୨୪ କାଲିସିୟା ଆଇଃକ୍‌ଗି ଖ୍ରୀଷ୍ଟତାଃରେ ଜିମାନ୍‌ତାନ୍

☆ ୫:୧୭ ୫:୧୭ କଲସିୟ ୪:୫. ☆ ୫:୧୯ ୫:୧୯ କଲସିୟ ୩:୧୭,୧୭. ☆ ୫:୨୨ ୫:୨୨ କଲସିୟ ୩:୧୮; ୧ ପାଡ଼ରାସ୍ ୩:୧.

ଲେକାଗି, କୁଡ଼ିକହ ଆକଗି ଆକଆଃ ଆପାନ୍ କଡ଼ାକଡ଼ାଃରେ ଜିମାନ୍ ଲାଗାଡ଼ିଙ୍ଗିୟାଃ ।

୨୫ ✧କଡ଼ାକ, ଖ୍ରୀଷ୍ଟ କାଲିସିୟାକେ ଦୁଲାଡ଼କେଦତେ, ଏନା ନାଗେନ୍ତେ ଜୀଉ ଏମ୍‌କେଦାଏ ଏନ୍ ଲେକାଗି ଆପେ ଆପେୟାଃ କୁଡ଼ିକକେ ଦୁଲାଡ଼କପେ । ୨୬ ଖ୍ରୀଷ୍ଟ କାଲିସିୟାକେ ଆୟାଃ ବାଚାନ୍ ଆଡ଼ଃ ଦାଆଃତେ ଫାର୍‌ତିକେଦତେ ନିୟାର୍‌କେଦା ଆଡ଼ଃ ପାର୍‌ମେଶ୍ୱାର୍‌ଆଃ ନାଗେନ୍ତେ ପାବିତାର୍ କାମି ନାଙ୍ଗ୍ ଜିମାକେଦାଏ, ୨୭ ଆଡ଼ଃ କାଲିସିୟାକେ ପାବିତାର୍, ବେଗାର୍ ଚିଗାଃଅ, ବେଗାର୍ ଦାଗିୟାଃ ଲେକା ପୁରାଃ ସୁଗାଡ଼ାନ୍‌ଗି ବାଇକେଦତେ ଆଇଃକ୍‌ଗି ତେଲାକେଦା । ୨୮ କଡ଼ାକ ଆପାନ୍ ହଡ଼ମ୍ ଲେକାଗି ଆର୍‌କାର୍‌କେଦତେ ଆପ୍‌ନାଃ କୁଡ଼ିକେ ଦୁଲାଡ଼ ଲାଗାଡ଼ିଙ୍ଗିୟାଃ । ଜେତାଏ ଆପ୍‌ନାଃ କୁଡ଼ିକେ ଦୁଲାଡ଼ିନିଃ, ଆପାନ୍‌କେଗି ଦୁଲାଡ଼ାଏ । ୨୯ ଜେତାଏ ଆପ୍‌ନାଃ ହଡ଼ମ୍‌କେ ଚିତ୍‌ଲାଅ କାଏ ହିଲାଙ୍ଗ୍‌ଆଁ । ମେନ୍‌ଦ ହଡ଼ମ୍‌ରେୟାଃ ଲାଗାଡ଼ିଙ୍ଗିତେୟାଃକ ଜଗାଅ ପୁରାତାନ୍‌ଲଃ ଏନାକେ ଜାଡ଼ନାଅଏୟା, ଜେ'ଲେକାଟି ଖ୍ରୀଷ୍ଟ କାଲିସିୟାକେ ଜାଡ଼ନାଅଆ, ୩୦ ଚିୟାଃଟି ଆବୁ ସବେନ୍‌କ ଆୟାଃ ହଡ଼ମ୍‌ରେନ୍ ହିସା ତାନ୍‌ରୁ । ୩୧ ଧାରାମ୍‌ପୁଥ୍‌ରେ କାଜିକାନା, “ନେଆଁ ନାଗେନ୍ତେ ହଡ଼ ଏଙ୍ଗା ଆଡ଼ଃ ଆପୁକେ ବାଗିକେଦ୍‌ତେ ଆପ୍‌ନାଃ କୁଡ଼ିଲଃ ମେସାନାଃଏ ଆଡ଼ଃ ଏନ୍ ବାରାନ୍‌କିନ୍ ମିଆଁଦ୍ ହଡ଼ମ୍‌କିନ୍ ହବାଅଃଆ ।” ୩୨ ନେଆଁରେ ଧାରାମ୍‌ପୁଥ୍‌ରେୟାଃ ମିଆଁଦ୍ ଉକୁଆକାନ୍ ସାର୍‌ତି କାଜି ଉନ୍‌ଦୁବ୍‌କାନା : ଏନା ଖ୍ରୀଷ୍ଟ ଆଡ଼ଃ କାଲିସିୟା ନାଗେନ୍ତେ ଲାଗାଡ଼ିଙ୍ଗିୟାଃ ମେନ୍ତେଇଙ୍ଗ୍ ଆର୍‌କାର୍‌ଉରୁମେ ତାନା । ୩୩ ମେନ୍‌ଦ ନେଆଁ ଆପେ ନାଗେନ୍ତେୟାଗି ଲାଗାଡ଼ିଙ୍ଗିୟାଁ । ମିମିଆଦ୍ କଡ଼ା ଆପ୍‌ନାଃ କୁଡ଼ିକେ ଆପ୍‌ନାଃ ଲେକାଗି ଦୁଲାଡ଼ିକାଏ ଆଡ଼ଃ ମିମିଆଦ୍ କୁଡ଼ି ଆପ୍‌ନାଃ କଡ଼ାକେ ମାଇନ୍ ଲାଗାଡ଼ିଙ୍ଗିୟାଃ ।



ହନ୍‌କ ଆଡ଼ଃ ଏଙ୍ଗାଆପୁକ

୧ ✧ଏ ହନ୍‌କ, ପ୍ରାଭୁଆଃ ନାଗେନ୍ତେ ଆପେୟାଃ ଏଙ୍ଗାଆପୁକକେ

✧ ୫:୨୫ ୫:୨୫ କଲସିୟ ୩:୧୯; ୧ ପାଡ଼ରାସ୍ ୩:୭. ✧ ୬:୧ ୬:୧ କଲସିୟ ୩:୨୦.

ମାନାତିକ୍ଷକପେ, ଚିୟାଃଚି ନେଆଁଗି ଠାଉକାତେୟାଃ ତାନାଃ ।
 ୨ “ଆପେୟାଃ ଏକ୍ଷାଆପୁକକେ ମାଇନ୍‌କପେ” ନେଆଁ ବାନାର୍‌ସାରେ
 ମେସାକାନ୍ ମିଆଁଦ୍ ପାହିଲା ଆନ୍‌ହୁ ତାନାଃ । ୩ “ଜେଲେକାଚି
 ଆପେୟାଃ ବୁଗିନାଃ ହବାଅଃଆ ଆତଃ ଆପେ ନେ ଅତେରେ ପୁରାଃ
 ସିର୍ମାପେ ଜୀହୁଦଃଆ ।”

୪ ✧ହେ ଆପୁକ, ଆପେୟାଃ ହନ୍‌କକେ ଆଲ୍‌ପେ ଖୁସ୍‌ଇଚିକଆ,
 ମେନ୍‌ଦ୍ ଇନ୍‌କୁକେ ପ୍ରାଭୁଆଃ ଇନ୍‌ିତୁ ଆତଃ ଚେନେତାଅତେ
 ଜାଡ୍‌ନାଅକପେ ।

କିରିଙ୍ଗ୍‌ୟାକାନ୍ ଦାସିକ ଆତଃ ଗୁସିୟାକ

୫ ✧ହେ କିରିଙ୍ଗ୍‌ୟାକାନ୍ ଦାସିକ, ଆପେ ଖ୍ରୀଷ୍ଟକେ ମାନାତିକ୍ଷତାନ୍
 ଲେକାଗି, ମନ୍‌ସୁରୁଦ୍‌ରେ ବରତେ ଏକ୍‌ଲାଅଃତାନୁଲଃ ଅତେରେନ୍
 ମାନଃଘା ଗୁସିୟାକକେ ମାନାତିକ୍ଷକପେ । ୬ ଗୁସିୟା ଆପେକେ
 ନେଲ୍‌ପେତାନ୍ ଇମ୍‌ତା ଆଇଃକ୍‌କେ ସୁକୁଇଚି ନାଗେନ୍ତେ ଏସ୍‌କାର୍
 କା କାମିକେଦ୍‌ତେ, ଖ୍ରୀଷ୍ଟଆଃ କିରିଙ୍ଗ୍‌ୟାକାନ୍ ଦାସିଲେକା ଆପେୟାଃ
 ସବେନ୍ ମନ୍‌ସୁରୁଦ୍‌ଲଃ ପାର୍‌ମେଶ୍ୱାର୍‌ଆଃ ମନେ ଲେକା କାମିପେ
 । ୭ ଆପେ ହଡ୍‌କଆଃ ଏସ୍‌କାର୍ ସୁସାର୍‌ତାନାଲେ ମେନ୍ତେ କା
 ଉଡ୍‌ଃକେଦ୍‌ତେ, ପ୍ରାଭୁଆଃ ସେଝାତାନାଲେ ମେନ୍ତେ ପୁରାଃ
 ସୁକୁମନ୍‌ତେ ଏନା କାମିପେ । ୮ ପାହାମାକାପେ, କିରିଙ୍ଗ୍‌ୟାକାନ୍
 ଦାସି ଚାଏ କା କିରିଙ୍ଗ୍‌ୟାକାନ୍ ଦାସି ସବେନ୍ ମିମିଆଦ୍ ହଡ୍‌କଆଃ
 ବୁଗିନ୍ କାମିରେୟାଃ ନାଲା ପ୍ରାଭୁଗି ଏମାକଆ ।

୯ ✧ହେ ଗୁସିୟାକ, ଆପେୟାଃ କିରିଙ୍ଗ୍‌ୟାକାନ୍ ଦାସିକକେୟ
 ଏନ୍‌ଲେକାଗି ନେଲ୍‌କପେ ଆତଃ ଇନ୍‌କୁକେ ଆଲ୍‌ପେ ବଡ୍‌କଆ
 । ପାହାମାକାପେ, ଆପେ ଆତଃ ଆପେୟାଃ କିରିଙ୍ଗ୍‌ୟାକାନ୍ ଦାସିକ
 ସିର୍ମାରେନ୍ ପ୍ରାଭୁଆଃ ତାନ୍‌ପେ । ଇନ୍‌ିଃ ସବେନ୍‌କକେ ମିଦ୍‌ଗି
 ବିଚାରକଆ ।

ଆମ୍‌ିକ୍‌ରେୟାଃ ଗଟା ହାଁତେୟାର୍

✧ ୭:୪ ୭:୪ କଲସିୟ ୩:୨୧. ✧ ୭:୫ ୭:୫ କଲସିୟ ୩:୨୨-୨୫. ✧ ୭:୯ ୭:୯
 କଲସିୟ ୪:୧; କଲସିୟ ୩:୨୫.

୧୦ ଚୁଣ୍ଡୁରୁ, ପ୍ରାଭୁଲକ୍ଷ ଯେସାକେଦ୍‌ତେ ଆୟାଃ ମାରାଙ୍ଗ୍ ପେଡେଃରେ ପୁରାଃଗି ପେଡେଜଃପେ । ୧୧ ପାର୍‌ମେଶ୍ଵାର୍ ଏମାକାଦ୍ ସବେନ୍ ହାଁତେୟାର୍ ତୁସିୟେନ୍‌ପେ, ଜେ'ଲେକାଚି ଆପେ ସାଏତାନ୍‌ରାଃ ଏଡକାନ୍ କାମିରେପେ ତିଙ୍ଗୁ ଦାଡ଼ିୟା । ୧୨ ଚିୟାଃଚି ଆରୁ ଅତେରେନ୍ ମାନଝାକଆଃ ବିରୁଧ୍‌ରେ କାରୁ ଲାଡ଼ାଇତାନା ମେନ୍‌ଦ ସିର୍ମା ଠାୟାଦ୍‌କରେନ୍ ଏଡକାନ୍ ଆମ୍‌ରେୟାଃ ପେଡେଃ ଆଡ଼ଃ ନେ ନୁବାଃ ଦିପିଲିରେ ରାଇଜ୍‌ତାନକଆଃ, ଆକ୍‌ତେୟାର୍‌ତାନକଆଃ ବିରୁଧ୍‌ରେ ଲାଡ଼ାଇତାନାରୁ । ୧୩ ଏନାତେ ନାହାଁଃ ପାର୍‌ମେଶ୍ଵାର୍ ଏମାକାଦ୍ ହାଁତେୟାର୍ ତୁସିଙ୍ଗ୍‌କେଦ୍‌ତେ ଏଡକାନ୍ ଦିପିଲିରେ ଆପେ ବାଇରିକଆଃ ଲାଡ଼ାଇରେ ତିଙ୍ଗୁ ଦାଡ଼ିୟାପେ, ଆଡ଼ଃ ଚୁଣ୍ଡୁଜାକେଦ୍ ଲାଡ଼ାଇରେୟ କେଟେଦ୍‌ରେ ତାଇନ୍‌ଦାଡ଼ିୟାପେ ।

୧୪ ଏନା ନାଗେନ୍ତେ ଆପେୟାଃ ମାୟାଙ୍ଗ୍‌ରେ ସାନାର୍‌ତିରେୟାଃ କାସ୍‌ନାତେ ତଲକାନ୍ ଆଡ଼ଃ ଧାରାମ୍‌ରେୟାଃ ବୁକୁପାଟା ତୁସିଙ୍ଗ୍‌କେଦ୍‌ତେ ତିଙ୍ଗୁନ୍‌ପେ, ୧୫ କାଗାରେ ଜୀଉସୁକୁରେୟାଃ ସୁକୁକାଜି ଲେକାନ୍ ଖାର୍‌ପା ତୁସିଙ୍ଗ୍‌କାନ୍‌ଲକ୍ଷ ସେକାଡ଼କେଦ୍‌ତେ ତିଙ୍ଗୁନ୍‌ପେ । ୧୬ ସବେନ୍ ଇମ୍‌ତା, ବିଶ୍ଵାସକେ ଢାଲ୍ ଲେକା ସାବକେଦ୍‌ତେ ସେସେନ୍‌ପେ, ନେଆଁରେୟାଃ ଦେଙ୍ଗାତେ ଏଡକାନ୍ ହରାତେ ହୁରାଙ୍ଗ୍‌ଅଃତାନ୍ ସବେନ୍ ଜୁଲ୍‌ତାନ୍ ସେଙ୍ଗେଲ୍‌ରେୟାଃ ସରକକେ ହକା ଦାଡ଼ିୟାପେ । ୧୭ ପାରିତ୍ରାଣ୍‌ରେୟାଃ ଚୁପୁରି ଆଡ଼ଃ ପାବିତାର୍ ଆମ୍‌ ଏମାକାଦ୍‌ପେ ପାର୍‌ମେଶ୍ଵାର୍‌ଆଃ ବାଗାନ୍ ଲେକାନ୍ ତାରାଉଡ଼ି ନାମ୍‌ଜମ୍‌ପେ । ୧୮ ପାର୍‌ମେଶ୍ଵାର୍‌ଆଃ ଦେଙ୍ଗା ଆସିକେଦ୍‌ତେ ବିକ୍ତି ହରାତେ ନେ ସବେନାଃ ରିକାଏପେ । ସବେନ୍ ଲେକାତେ ପାବିତାର୍ ଆମ୍‌ରେୟାଃ ହରାତେ ବିକ୍ତିପେ । ଚିର୍ଗାଲକାନ୍ ତାଇନ୍‌ପେ, ଚିଉଲ୍‌ଅ ଆଲ୍‌ପେ ଲାଗାଃଅଆ, ପାର୍‌ମେଶ୍ଵାର୍‌ଆଃ ହଡକ ନାଗେନ୍ତେ ସବେନ୍ ଇମ୍‌ତା ବିକ୍ତିରେ ତାଇନ୍‌ପେ । ୧୯ ଆଲ୍‌ୟାଃ ନାଗେନ୍ତେୟ ବିକ୍ତିପେ, ଜେ'ଲେକାଚି ସୁକୁକାଜିରେୟାଃ ଉକୁଆକାନ୍ କାଜିକେ ବେଗାର୍ ବରତେ ଉଦୁବ୍ ନାଙ୍ଗ୍ ପାର୍‌ମେଶ୍ଵାର୍ ଆଇଙ୍ଗ୍‌କେ ଦେଙ୍ଗାଲ୍‌ୟା । ୨୦ ନାହାଁଃ ଆଇଙ୍ଗ୍ ଜେହେଲ୍‌ରେ ସିକିଡ଼ିକାନ୍ ତାଇନ୍‌ରେୟ, ସୁକୁକାଜି ନାଗେନ୍ତେ ଆଇଙ୍ଗ୍ ମିଆଁଦ୍ କାଜି

ଇଦିସେଟେର୍ ହଡ଼ ତାନିଙ୍ଗ୍ । ବିକ୍ରିପେ, ଜେ'ଲେକାଟି ଆଇଙ୍ଗ୍
ବେଗାର୍ ବରତେ ସୁକୁକାଜିଇଙ୍ଗ୍ ଉଦୁବ୍ ଦାଡ଼ିୟା ।

ତୁଣ୍ଡୁ ଜୁହାର୍

^{୨୧} ✠✠ ଆଇଁୟାଃ ବିଷାଏରେ ଆପେ ଜେ'ଲେକା ସାରି ଦାଡ଼ିୟାପେ,
ଏନାମେନ୍ତେ ଆଲେୟାଃ ଦୁଲାଡ଼୍ ହାଗା ଆଡ଼ଃ ପ୍ରାଭୁଆଃ କାମିତାନ୍
ପାଡ଼ିୟାରଃ ଲେକାନ୍ ଦାସି ତୁଣ୍ଡୁକ୍, ଆଇଁୟାଃ ବିଷାଏରେ ଆପେକେ
ସବେନ୍ କାଜି କାଜିୟାପେଆ । ^{୨୨} ଆଲେ ସବେନକ ଚିଲ୍ଲକା
ମେନାଲେୟା, ଏନ୍ ବିଷାଏରେ ଉଦୁବ୍ କେଦ୍ ତେ ଆପେୟାଃ ଜୀଉରେ
ରାସ୍ କାପେ ନାଗେନ୍ତେ ଆଇଙ୍ଗ୍ ଇନିଃକେ ଆପେତାଃତେଇଙ୍ଗ୍
କୁଲିତାନା ।

^{୨୩} ଆବା ପାରମେଶ୍ୱାର୍ ଆଡ଼ଃ ପ୍ରାଭୁ ଯୀଶୁ ଖ୍ରୀଷ୍ଟ୍ ବିଶ୍ୱାସୀ
ହାଗା ମିଶିକକେ ଜୀଉସୁକୁ, ଦୁଲାଡ଼୍ ଆଡ଼ଃ ବିଶ୍ୱାସ୍ ଏମାକକାଏ ।
^{୨୪} ଅକନକ୍ ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍ କେ କା ତୁଣ୍ଡୁ ଦୁଲାଡ଼୍ ତେ
ଦୁଲାଡ଼୍ ତାନାକ, ଇନ୍ କୁଲଃ ପାରମେଶ୍ୱାର୍ ଆଃ ସାୟାଦ୍ ହବାଅଃକା ।

ପାରମେଶ୍ଵାରଆଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵାରଆଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

ପାରମେଶ୍ଵାରଆଃ ଜୀନିଦ୍ ବାଚାନ୍
ନାଞ୍ଜା ନିୟମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6